

Bummel 1985 - 10. Merze

Eb root, eb blau, dr Wäg isch frey;  
s'Comité legt ys in Wäg kai Schtai:  
D'Mutze-Bebbi derfe-n-iber d'Route laufe;  
sy hän sich's zwoor miess mit zwai Uusdritt erkaufe!

E Hiehnerhoof het sich bim Schnabel besammlet,  
sy schtehn im Schtrau, chari-vari, oder vergammlet.  
Fir e Clique-Blagette het das zwoor nit glängt -  
aber fascht - wär hät das dänggt!

Die Alte, d'Schtänzler, dr Glopfgaischt und eso,  
die Raihefolg isch hailig, froog mi nit wieso!  
Mer gän im Dambuurmajör zem die andere-n-au iebe  
statt em Zeedel esone Regischter zem d'Märsch verschiebe!

Mit drumme-n-und mit pfyffe-n-iber die Mittleri Brugg  
laufe d'Mutze-Bebbi iber d'Route hi und zrugg  
mit eme brächtige Vordrab zwaimool vorem Comité dure,  
und s'Comité het nit emool e dummi Schnuure.

Hinde-n-in dr Mitti lauft är wichtig mit  
im typische Schleppegang, im Dambuureschritt;  
me heert vo ihm kai falsche Doon:  
vom jingschte Dambuur, vom PADDINGTON!

Spalebärg, Gämsbärg, Noodlebärg, do kunnt beschtimmt kai Waage,  
das Bermudadreyegg isch offebar magnetisch glaade.  
Und fir dr näggschti Halt - do hilft kai winsle -  
finde d'Mutze-Bebbi als no-n-e freyi Dramminsle!

Sottsch mit drey Dambuure nit iber dr Märt marschiere,  
wenn D'vor e Baiz kunnsch, sottscht dr Majer richtig plaziere,  
bi Drummelmärsch laufsch au als Pfyffer im Schritt - Digge! -  
das wär - kurz zämmegfasst - dr Mutze-Bebbi-Knigge!

Scho goht's am Donnshdigmorge gege die Viere,  
d'Mutze-Bebbi dien als no gschlosse ummemarschiere,  
do sait doch bletzlig ain - s'isch nit zem lache -  
mer doch jetzt statt em Aendschtraich no dr Bärgbrys mache!  
*kennete*